

Arnat naartusut erninissaannut sapaatip akunneri sisamaannanngortut tagginneqarneraniit naartunerminnun atatillugu sulinngiffeqartalernissaat pillugu Naartunermi, erninermi meeravissiartaarnermilu sulinngiffeqartarneq ullormusiaqartarnerlu pillugit Inatsisartut inatsisaat nr. 14-ip, 7. december 2009-meersup allannguutissaanik saqqummiussequllugit Naalakkersuisut peqquneqarnissaannik Inatsisartut aalajangiiffigisassaattut siunnersuut
 (Inatsisartuni ilaasortaq Randi Vestergaard Evaldsen, Demokraatit)

Akissuteqaat

(Peqqissutsimut, Isumaginninnermut Inatsisinillu atuutsitsinermut Naalakkersuisoq)

Siullermeerinninneq

Naalakkersuisut Inatsisartut aalajangiiffigisassaattut siunnersuummut saqqummiunneqartumut qujapput.

Ilaqtariiussuseq inuiaqatigiinnitsinni toqqammaiviavoq, aamma meeqqat inuusuttullu atugarisaannik pitsangorsaalluta suliaqaraangatta ilaqtariit atugarissaarnerat pingarnerpaajusarpoq. Taamaammat Naalakkersuisut ataatsimoortumik ilaqtariinnut politikkimik ineriartortitsillutik suliaqarput, tassani qulakkeerneqassaaq, naalakkersuinikkut suliassaqarfut assigiinngitsut akornanni ilaqtariittut inuunerup qitiutinneqarnissaa. Ilaqtariit ingerlalluartuussappata, nukittuujussappata aamma peqqissuuussappata assigiinngitsunik iluseqartunik, aamma suliassaqarfinni arlalinni suliniuteqarnissaq pisariaqarpoq. Naalakkersuisut isumaliutiguarpaat, ilaqtariinnut meerartalinnut atugassarititaasunik pitsaasunik qanoq pilersitsisoqarsinnaanersoq, tamatumani naartunermi, erninermi meeravissiartaarnermilu sulinngiffeqartarnermut atatillugu pissutsinik pitsangorsaanissaq ilaavoq.

Naalakkersuisut naartunermi, erninermi meeravissiartaarnermilu sulinngiffeqartarnermut atatillugu Inatsisartut inatsisissaattut siunnersuutissaminnik suliaqarput. Inatsisissatut siunnersuutikkut ilaatigut qulakkeerneqassaaq, ilaqtariit meerartallit meerartaarnermut atatillugu sulinngiffeqarnerup nalaani naleqquttumik pilersornissaminnut tunngavissaqarnissaat, kiisalu angajoqqaat sulinngiffeqartarnerisa sivitsuiffiginissaat pillugu aalajangiiffigisassatut siunnersuutip UPA2018/106-ip piviusungortinnejarnissaa.

Siunnersuutissamut atatillugu Naalakkersuisunit, pitsangorsaanerit allat suut pisariaqartinnejarnersut isiginiarneqarsimavoq, taamaasilluni erninissap qanillinerani aamma ernereernerup kingorna ilaqtariit atugaat pitsaanerulersinneqassapput.

Siunnersuutissami ernereernerup kingorna angajoqqaat sulinngiffeqartarnerisa sivitsuiffiginissaata saniatigut, suliffeqarfinnut namminersortunut meerartaarnermut atatillugu aningasaateqarfimmik pilersitsisoqarnissaat kiisalu pisortat suliffeqarfiutaanni erninersiutinik nalimmassaanermik aaqqissuussisoqarnissa eqquunniarneqartoq takuneqarsinnaassaaq.

Ermineq erninissamut killerititaasoq sapaatip akunneri pingasut sioqqullugit pisimappat, ernineq piffissaq eqqorlugu erninertut isigineqartassaaq. Taamaattumik arnap aallaaviatut ulloq erniffissatut naatsorsuutigineqartoq sapaatit akunnerinik marlunnik sioqqullugu aatsaat sulinngiffeqarsinnaatitaalertarnera unammillernartoqarmat Naalakkersuisut isumaqtigaa.

Arnat nunagisamik avataani erniartornissaminut innersuunneqartut, erniartorlutik aallarnerminnngaanniit sulinngiffeqartitaalissasut inatsisissatut siunnersuutissami sulissutigineqarpoq.

Tamatuma saniatigut Naalakkersuisut suliniutinik arlalinnik sulinngiffeqarnermi pitsangorsaanernik qulakkeerinnittussanik suliaqarput, matumani angajoqqaat sulinngiffeqarnerup iluani meeqqaminik annasaqartut sulinngiffeqartitaasarnissaat ilanngullugit, kiisalu angajoqqaat assigiimmik suaassusillit inatsisitigut illersugaanerisa pitsangorsaavagineqarnissaat ilaavoq. Erninermut atatillugu sulinngiffeqartarnermut inatsisimmi allanngortitsinissat 2019-imut aningaasanut inatsisip akuersissutigineqarneranut atatillugu aningaasaliissutigineqartut iluannit aningaasalersorneqassapput. Siunnersut manna 3,9 mio. kr.-inik akeqassasoq nalilerneqarpoq, taakkulu sumit aningaasalersorneqassanersut innersuussutigineqanngilaq.

Taamatut oqaaseqarlunga siunnersuutip itigartitsissutiginissaa Naalakkersuisut sinnerlugit inassutigissavara.